

大清會典
兵部



大清會典卷之

兵部

武庫清吏司

軍器

凡軍器造自工部。部掌其政。制度有定數。簡閱有定期。年久朽損。或出征殘闕者。準如數修補。官兵新舊接代。令交明軍器。自製者給直。營伍贏餘軍器。令官兵典守。以備用。有損敝者毀之。私賣私典者論。

凡軍器制度。甲冑之制。以鐵二片。製如帽形。曰



冑。爲盤於冑之頂。以受管。管以承槍。槍以繫纓。槍纓之制。有差等。親王。郡王。用三角起花金槍。嵌寶石。或嵌松子珊瑚。不嵌者聽。不得用東珠。以薰貂二十四條。垂爲纓。貝勒。貝子。用起花金槍。纓同。入八分公。插蜜鼠尾。領侍衛內大臣。都統。插鵬翎二。均垂貂尾爲纓。在內大臣內行走之公。侯。伯。和碩額駙。郡主。額駙。散秩大臣。許插蜜鼠尾。垂紅氂纓。隨旗行走之公。侯。伯。統領。副都統。均插薰獺尾。垂紅纓。上三旗侍衛。鑾儀衛官。插豹尾。五旗王府長史。護衛。典儀。均插猞猁尾。王府長史。垂

黑纓。餘均紅纓。前鋒護軍。叅領。侍衛。插獺尾。垂黑纓。驍騎。叅領以下。插獺尾。垂紅纓。前鋒校。親軍校。護軍校。前鋒護軍。均鐵頂紅纓。領催。驍騎。均鐵頂黑纓。直省督撫提鎮。與都統同。副叅以下。與統領同。軍士。與前鋒護軍同。垂於冑之後者曰護項。垂於冑之兩旁者曰護耳。護耳之下曰護頸。官。以青段爲表。五品以上。繡蟒。軍士。以布爲表。均傳以鐵葉。甲衣。幅四。護肩二。袖二。護腋二。遮襠一。左襠一。甲裳。幅二。官。以青段爲表。繡蟒。軍士。以布爲表。八旗驍騎。以繡布爲表。各如其本旗之色。前鋒校。護

軍校以白繡繪爲表。前鋒護軍以青布爲表。均傅以鐵葉。施鐵葉於外者曰明甲。侍衛鑾儀衛官護衛典儀前鋒校護軍校前鋒護軍之甲裳用之。○弓矢之制。弓幹用榆木。弓面傅以牛角。背施筋膠。幹一而角兩接。接處加鹿角。以煖木皮裹之。曰弓弣。弣用桑木。鏤其末以受弦。弦有二。曰纏絲弦。教射用之。曰皮弦。戰陣用之。弓力之強弱。視幹與角之厚薄。筋膠之輕重。以爲斷。矢用柳樺之木。刻銜口於矢之末曰括。其端受鏃。剪鵠鶴翎膠粘於箭括之上曰箭羽。○旗纛之制。

八旗旗纛。視本旗之色爲辨。都統纛。方幅。長五尺五寸。廣五尺。繪龍。鐵頂朱髦。惟正紅旗用黑髦。佐領纛。長四尺二寸。廣五尺。不繪采。髦頭色黑。領催小旗。長尺有五寸。廣尺有八寸。八旗同式。於鐵頂。各異其製。以示別。護軍營纛。裁方幅爲三角。邊作火燄形。直長五尺五寸。斜長七尺三寸。繪龍。鐵頂朱髦。護軍校小旗。直長尺有二寸。斜長尺有三寸。前鋒營旗。方幅。長二尺三寸。廣尺有八寸。繪飛虎。頂飾豹尾。髦頭色赤。火器營纛。護軍驍騎。各如其本營之式。加號帶以別。

均綠色

之直省標營。燾直長五尺八寸。斜長一丈。邊作火燄形。或繪雲蟒。或繪飛熊。隨地異製。無定式。鐵頂朱髦。什長旗。直長二尺三寸有奇。斜長三尺八寸。餘與大燾同。督撫提鎮。大帥旗。以黃布為之。方幅。廣丈有八寸。長丈有四尺。大書帥字。飄帶一。長丈有五尺。廣一尺。其門旗。令旗。督陣旗。先鋒旗。稟事旗。均隨營異製。駐防各營旗燾。

盛京。西安。江寧。京口。綏遠城。將軍。天津。都統。熱河。副都統。用鑲黃旗色。船廠。寧夏。青州。杭州。福州。將軍。山海關。副都統。用正黃旗色。黑龍江。涼州。

廣州。荊州。將軍。成都。副都統。用正白旗色。兼轄之副都統。各視將軍。都統旗色。火器刀仗。制詳工部。

凡給軍器。金鼓。以示進退之節。八旗漢軍。鳥槍營。礮營。每旗各鼓一。金五。海螺。以定朝昏之聚散。八旗驍騎營。每佐領下。各設海螺一。每叅領下。各設海螺二。護軍營。每旗設海螺三十六。前鋒營。左右翼。設海螺十有六。火器營。每旗。隨礮海螺各五。鳥槍護軍。鳥槍驍騎。海螺各十有四。藤牌營。每旗。海螺各五。鹿角。以禦人馬。漢軍八旗。每佐領。設鹿角各一。直省標營。金鼓。海螺。鹿

角。視營之大小。兵之多寡。隨地酌設。軍士應用軍器。按名給發。八旗前鋒。護軍。領催。均甲一。胄一。索韃一。弓一。矢七十。佩刀一。驍騎。矢五十。餘同。步軍。甲一。胄一。佩刀一。弓一。矢三十。八旗護軍。驍騎。每二人。給長槍一。每佐領下。鳥槍前鋒。鳥槍護軍。鳥槍驍騎。各給鳥槍一。漢軍。每旗。藤牌手。百人。各給藤牌一。刷刀一。挑刀手。五十人。各給挑刀一。綿甲兵。各給連枷棍一副。八旗滿洲。每旗。設子母礮五。其餘大小銅鐵礮。均分貯於漢軍八旗礮局。需用乃發。直省各營。馬

步兵。應給甲胄。佩刀。與八旗同。操演軍器。專習者。爲弓矢。爲大礮。爲鳥槍。爲藤牌。兼習者。爲大刀。爲長槍。爲挑刀。水師。則有排槍。鈎鏹槍。標槍。大斧。鐵彈。火箭。火礮之屬。水陸異用。險易異宜。習者。期純熟。教者。毋擅更。大礮。以兵千名。設十礮。爲率。郡邑城守。邊海要隘。水師戰艦。各貯礮於其所。兵少。及非要隘。營汛。貯礮於督撫提鎮駐劄之地。需用乃發。仍以時演放。毋令銹蝕。收貯火藥。加謹防護。毋致疎虞。有棄毀及私移他所者。論私鑄大小礮。私藏鳥槍者。罪之。○八旗

世爵暨文武官各備甲一。胄一。弓二。索韃一。佩
刀一。公之矢五百五十。侯五百。伯四百五十。子
四百。男三百五十。輕車都尉二百五十。騎都尉
二百。雲騎尉百五十。武官一品至五品視子男
以下。六品以下均矢百。文官三品京堂視武二
品。四品京堂科道郎中視三品。員外郎視四品。
主事。鳴贊。廕監生視五品。筆帖式視六品。直省
督撫提鎮及武職副叅以下官應備甲胄弓矢
各按品級與八旗武職同。

凡簡覈軍器八旗前鋒營護軍營驍騎營及內

務府護軍營各官兵鎧仗三年一次由旗奏請。

特命王公大臣驗閱駐防將軍都統副都統於到任
後率所屬簡稽軍營鎧仗同城限二月外屬限
三月竣事游牧兵丁鎧仗由部奏請。

特命大臣驗閱各察其盈絀利鈍具疏以
聞直省標營軍器以都司守備為專管官副將叅將
游擊為兼管官遇有動用修補估價詳報給公
項治備歲終彙送布政使司覈銷督撫提鎮歲
委官察驗取具冊結年終彙疏保題以冊詳部
稽覈虧闕者論



